


CELEBRACIÓN EN OS COTOS

9-10 de maio do 2026

VI SEMANA DO TEMPO DA PASCUA



Os COTOS COA IGUALDADE VERDADEIRA DAS PERSOAS,
COS POBOS QUE SOFREN INXUSTIZA E ABANDONO,
COS REFUXIADOS E MARXINADOS DA SOCIEDADE,
COA NATUREZA MALTRATADA,
E SEMPRE SEMENTANDO PAZ



1.- ENCONTRO DA COMUNIDADE

(tod@s de pé)

@ monitor/a está na sé

SAÚDO DE BENVIDA

🎵 *nº 1 A Cristo cantamos*

Celebrante:

Benvidos sexamos todos a esta celebración. Reunímonos para compartir en comunidade a nosa fe no nome do Pai, do Fillo e do Espírito Santo.

Aquí estamos porque cada oito días, con toda a Igrexa reunímonos para festexar a Pascua do Señor Xesús, unha Pascua que só pode ser crible nos soños da paz.

Na vida hai un tempo para aprender, e un tempo para vivir o aprendido. Iso foi o que lle pasou aos discípulos, pois o tempo no que compartiron con Xesús serviulles para facer seus aqueles consellos, ideas e reflexións.

Esa é tamén a nosa experiencia cando estamos rematando o tempo da pascua. Ao longo destes días Xesús foinos amosando o seu xeito de sentir e facer, e agora facemos nosos eses seus consellos: amar a Deus coma Pai, amar ás persoas coma irmáns, e amar a terra como fogar.

E agora, aquí, como igrexa, como parroquia, celebramos a fe que fai de nós unha comunidade que camiña da man de Xesús facendo crible a Pascua.

🎵 *nº 1 A Cristo cantamos*

ACOLLIDA DA AUGA

Celebrante: Fixemos memoria do noso bautismo na celebración da vixilia pascual. Alí compartíamos a auga de toda a comunidade dos Cotos, e agora aquí na parroquia, queremos lembrar que Cristo non nos deixa sos, queremos sentirnos confiados en Deus porque é Pai-Nai, e queremos agradecer a vida coa que El nos agasalla en cada Pascua. Dicímoslle

BENDITO SEXAS POR SEMPRE SEÑOR

Monitor/a

- * Deus creador de todas as cousas, que pola auga e o espírito, nos fixeche renacer á vida do evanxeo
- * Xesús, Ti que convidaches á primeira comunidade a ser testemuña anunciando o evanxeo a todas as xentes
- * Espírito Santo, que fas renacer á Igrexa polo alento da Pascua, e que nos convidas a ser auga viva

ORACIÓN PROPIA DO DÍA

Celebrante: Rematamos a primeira parte da celebración presentando no silencio o que rebule no noso interior. Facémolo agradecidos por poder compartir a Pascua, por poder seguir soñando paz.

(Silenzo)



Celebrante: Deus de misericordia, e cheo de amor, axúdanos a seguir celebrando dun xeito responsable estes días de alegría en honor a Xesús, o Resucitado.

Que practiquemos nas obras o que celebramos na fe. Pedímoscho polo mesmo Xesucristo que Resucitado vive e reina contigo na unidade do Espírito santo, por sempre eternamente. Amén.

2.- PROCLAMACIÓN DA PALABRA DE DEUS

(sentad@s) a palabra de Deus proclámase dende o ambón

Celebrante: Nestes días da pascua somos invitados a pousar a nosa mirada no bo facer da primeira comunidade. Agora, no libro dos feitos dos apóstolos imos escoitar como se achegan a Samaría para espallar a Palavra de Deus.

No evanxeo, Xesús hoxe dínolo ben claro: Eu non vos deixarei sos, enchereivos do Espírito.

Amándonos coma irmáns estamos testemuñando que Xesús está con nós.

Escoitemos.

LECTURA DO LIBRO DOS FEITOS DOS APÓSTOLOS

Daquela, Felipe baixou á cidade de Samaría e predicoulles o Mesías. O pobo, dun acordo, atendía ao que dicía Felipe, sentindo e vendo os sinais que facía; pois de moitos posuídos saían espíritos impuros a berros, e moitos paralíticos e coxos quedaban curados. A cidade encheuse de alegría.

Ao sentiren dicir os apóstolos, que estaban en Xerusalén, que Samaría acollera a palabra de Deus, mandáronlles a Pedro e a Xoán. Baixaron logo alí, e oraron polos samaritanos, para que recibisen o Espírito Santo, pois aínda non baixara sobre ningún deles: só os bautizaran no nome do Señor Xesús. Entón, fóronlles impondo as mans e recibiron o Espírito Santo.

Palabra do Señor

🎵 *nº 2 Ide e pregoad e a Nova de Deus* SALMO



5

(en pé) *Leccionario I A páx 160 Xn 14, 15-21 EVANXEO*

PROCLAMACIÓN DO SANTO EVANXEO SEGUNDO XOÁN

Daquela díxolle Xesús aos seus discípulos:

Se me amades, gardaredes os meus mandamentos, e eu rogareille ao Pai, e daravos outro Paráclito para que decote estea convosco: o Espírito da Verdade. O mundo non o pode acoller, pois non o ve nin o coñece; mais vós coñecédelo, pois permanece onda vós e está en vós. Non vos deixarei orfos; logo volvo onda vós. Un pouquiño máis e o mundo xa non me verá; pero vós habédesme ver, que eu vivo e tamén vós habedes vivir. Naquel día coñeceredes que eu estou en meu Pai, e vós en min, e eu en vós. Quen ten os meus mandamentos e os garda, ese ámame; o que me ama será amado por meu Pai, e eu amareino e manifestareime a el.

Palabra do Señor

(sentad@s) gardamos uns instantes de silencio para acoller a palabra no corazón



6

UNHAS PALABRAS DE REFLEXIÓN

Hoxe, atopámonos con Xesús dicíndonos que El non nos deixará sos, pero onde e cando está El con nós?

* Non nos deixa sos, e está á nosa beira cando facemos comunidade e parroquia, deixando a un lado o que nos diferencia e valorando o que nos une.

* Non nos deixa sos, e está á nosa beira en cada persoa que se esforza por sementar paz nestes tempos nos que enseguida somos violentos coas palabras e cos feitos.

* Non nos deixa sos, e está á nosa beira cada vez que facemos ben a alguén, mesmo sen esperar nada a cambio.

* Non nos deixa sos, e está á nosa beira en cada un dos fogares da parroquia, tanto nos que a vida reborda como nos que parece que a vida se vai esquecendo.

* Non nos deixa sos, e está á nosa beira cando temos un bo día e nos sentimos satisfeitos, e está tamén cando por unhas ou outras razóns o día non é bo.



RENUNCIAMOS AO MAL

Celebrante Neste tempo da Pascua, deixándonos alumar pola luz da fe, renovamos os nosos compromisos na loita contra o mal porque queremos facelo mellor.



Monitor/a

▪ **Renunciades a cervos superiores aos outros; isto é: a calquera clase de abuso, discriminación, orgullo, egoísmo e desprezo?**

Si, renunciemos

▪ **Renunciades a calar diante das inxustizas e as necesidades das persoas e dos pobos, por covardía, preguiza, comodidade e vantaxes persoais?**

Si, renunciemos

▪ **Renunciades aos criterios e comportamentos que fan do diñeiro a aspiración máis grande da vida, que poñen o pracer por enriba de todo, e que aprecian a liberdade persoal e o individualismo por enriba da responsabilidade social e da comunidade?**

Si, renunciemos

PROFESIÓN DA FE

Celebrante Neste tempo da Pascua, deixándonos quecer á beira do RESUCITADO compartimos o credo dicindo
SI CREMOS

Monitor/a:

Cremos en Deus,
Pai e Nai de todos os homes e mulleres,
que nos agarima nas súas mans
e que conta con nós para mellorar a vida?

SI CREMOS

Cremos en Xesús, o seu Fillo Benquerido,
sempre atento para dar unha man,
e que nos quere dando vida á Pascua
co noso bo facer de cada día?

SI CREMOS

Cremos no Espírito Santo,
que nos alenta para soñar paz,
que nos alenta para berrar contra a violencia,
que nos alenta para ser tolerantes e respectuosos?.

SI CREMOS

Cremos na Igrexa,
unha Igrexa que se fai crible en comunidade,
acolledora, respectuosa, coidadora da terra
e responsable no aprezo á vida en igualdade
de todas as mulleres e homes?

SI CREMOS

ORACIÓN UNIVERSAL

Celebrante: Irmáns e irmás, invoquemos agora a misericordia de Deus que nos quere ben; oremos coa nosa pregaría da Pascua dicindo

SEÑOR DA VIDA, ESCOITA A NOSA ORACIÓN

Monitor/a:

- ✓ Señor, non nos deixes sos cada vez que pensemos máis en nós mesmos, e menos na parroquia. Oremos
- ✓ Señor, non nos deixes sos cada vez que esixamos os nosos dereitos esquecendo as nosas obrigas. Oremos
- ✓ Señor, non nos deixes sos cada vez que sexamos intolerantes con quen pensa e vive diferente. Oremos
- ✓ Señor, non nos deixes sos cada vez que nos creamos mellores que os demais. Oremos
- ✓ Señor, non nos deixes sos cada vez que pretendamos ser crentes contentándonos coas rutinas e os costumes. Oremos
- ✓ Señor, non nos deixes sos, contigo ben conta nos damos que podemos facer mellor as cousas nos camiños da paz. Oremos

Celebrante: Señor, Ti es o noso Pai, e Cristo o noso Irmán que promete estar á nosa beira enchéndonos co seu Espírito, acolle estas pregarías que pousamos nas túas mans. Ti que vives e reinas por sempre eternamente. Amén

3.- OS SIGNOS DA COMUÑÓN CON DEUS E COA COMUNIDADE

NOSO PAI

Celebrante: *Con Cristo á nosa beira queremos deixarnos aconsellar por El, queremos facer nosas as súas palabras, por iso somos quen de rezar dicindo coma El nos aprendeu:*

NOSO PAI ...

SIGNO DA PAZ

Celebrante: *“PAZ CONVOSCO”; as palabras do resucitado volven ser pronunciadas hoxe na nosa comunidade. Fagamos honor ao noso nome de cristiáns; acollamos a paz e deamos exemplo dela no fogar e na parroquia. Sexamos cribles na paz.*

🎵 *Fagamos a paz irmáns*

COMUÑÓN

Celebrante: *Pola man dos apóstolos faciáanse moitos signos e aquela primeira comunidade botaba a andar. Nós compartimos unha mesa en comunidade como signo dunha vida toda ela compartida, no que temos, no que somos, no que amamos, no que valem. Ditosos nós convidados a esta festa da Pascua do Señor.*

Señor, eu non son merecente de que entres no meu fogar, mais unha palabra túa abonda para me salvar

🎵 *nº 8 No colo da miña nai*

4.- AVISOS E DESPEDIDA

ORACIÓN FINAL

Celebrante: *Señor, Noso Pai, que a celebración que temos compartido, nos alente no esforzo por guiar os nosos pasos polos vieiros do teu reino, dando froitos dabondo para os demais. Pedímoscho por Cristo que vive e reina Resucitado para sempre eternamente. Amén*

Con Xesús Resucitado á nosa beira queremos facer vida na nosa comunidade, coas nosas xentes.

Con Xesús Resucitado á nosa beira queremos fartar as sedes de xustiza de todas as persoas que non son respectadas por pensar, crer ou vivir diferente.

Con Xesús Resucitado á nosa beira queremos compartir arredor da mesa que nos fai comunidade, facéndonos cribles en Os Cotos e para toda a Igrexa.

Avísase das misas (ver folla do mes)

*Que teñamos un bo día,
que esta siga sendo unha boa PASCUA
e o Señor nos bendiga, † nos garde de todo mal
e nos leve ao seu fogar de vida eterna. Amén
Podémonos ir en paz. Deámoslle grazas a Deus*

🎵 *nº 2 Ide e pegoade a Nova de Deus*